

四庫全書

集部

欽定四庫全書

集部

篁墩文集卷八十七

詳校官編修臣李堯棟

中書臣劉源溥覆勘

總校官進士臣朱鈐

校對官監丞臣張魯炳

謄錄監生臣錢雋選

欽定四庫全書

篁墩文集卷八十七

明 程敏政 撰

詩

謝都憲侶公過訪

喜雀紛紛噪竹枝，果然旌節訪茅茨。  
同年幾是論心者，未老重驚會面時。  
梅雨一天陰不定，萍星千里渺何之。  
閒情且落清尊外，共倒奚囊說近詩。

送都憲侶公

幾停旄鉞問耕蠶又過山城拂曙嵐五月風霜隨遠邇  
萬年財賦出東南臺恩再慰忠賢望郡澤猶聞父老談  
只恐廟堂還柱石道傍無計綰歸驂

楊村寺與侶都憲聯句為別

一尊相餞石溪邊敏政離思紛紛總悵然流水門前翻

白雪鐘好峯雲外疊青蓮威生玉節今初下敏政情到

金蘭古亦便幸遇心知程學士鐘不辭傾倒夕陽天敏

政

松崖為縣人胡昭題

同邑胡君靜夫妙年嗜學喜從予論詩有所賦詠  
不工不已嘗題其居曰松崖請一言予甚愛其人  
故為賦此

老髯踞石幽且貞喜君卜居若平生三更繞地星月碎  
九夏半空風雨驚知心晏歲竹連塢過眼一春花滿城  
斲苓有約幸無拒杖策來尋猿鶴盟

夢椿卷為嘉禾金景仁賦

久別音容感夢思覺來人境悵何之清宵正及神遊處  
白日猶疑面命時鄉里好題慈孝傳塋封誰作著存祠  
因君無限增悲慨目盼庭柯與賦詩

王黃門李推府京華冬夜酌別詩次韻

月上離筵夜停燭霜滿寒柯鴉競宿登科曾喜花共簪  
待漏終期佩聯玉一尊莫慰征車早欲挽銀河助傾倒  
直道無憂行路難暘谷雲開碧天晶

致政馮憲副佩之自淅見訪同到南山竹院

南風驚會舊西臺扶杖呼童掃徑苔語到往年惟大噓  
酒愁多處亦全開娛情知為遊山出送別魚成看竹來  
莫倚路長催早發畏人炎日滿高槐

與佩之及黃司訓汝彞聯句六首

弘治壬子六月致政憲副馮君佩之自淞西登遊  
至新安廼十九日挾一童冒熾暑過休寧蓋不相  
見者十年矣時予以末病謝客甚殆然獨喜君之  
來談笑竟日忘其為病人也明日約縣庠黃汝彞

司訓同至南山竹院少暢合并之懷酒半汝曩不  
至乃相與為聯句章成者三而汝曩走馬涉溪來  
會倒尊大噱更得三章焉中世以來士之屏居者  
類多匿跡不肯與世伍予每過之浮雲軒冕固不  
足道一時毀譽自有公言是豈足以病已而為此  
局局何也高情曠識若君者今豈多見哉予久病  
才氣衰減筆研都廢視君之健矐乎莫及而亦不  
能不為之振迅乃題其聯句之首如此齊雲岩為



吾郡第一勝處君將拉汝彞同登予不能從其所  
得篇什當別自為卷云會之又明日程敏政克勤

引

想見清儀觸熱來蘭高懷真是不凡才一尊傾倒驚頭

白敏政兩日追陪笑口開動樹好風嵐氣散蘭繞山斜

照鶴初回相看去住情何極敏政門外驪駒且莫催蘭

每誦停雲憶故人敏政江湖何幸接風神論文自託平

生芻蘭看竹如償未了因野菜旋挑供午餉敏政山醅

初熟稱時巡詠歌不減風雩意蘭坐聽征軺走旱塵敏

南山脩竹照深盃蘭何似蘭亭曲澗隈敢道人烏今併

好敏政不於奴馬此重來卜鄰我亦懷王翰蘭覽勝君

能挈辨才林壑便應添故事敏政野猿山鶴謾相猜蘭

山館斜陽客到遲敏政清風便擬著君詩蘭移尊竹外

晚臨水倫策馬松陰剛赴期敏政老眼自應空鴈蕩蘭

草書誰復似鷺池倫玉山我愧薰葭倚敏政醉後還歌

伐木詞蘭

二公高興薄秋雲蘭千里誰來此會文倫多病頓從今

日減敏政清風應許故人分蘭片時遲到悔終古倫百

首易成酬此君敏政安得齊雲岩上去蘭放開道眼掃

塵氛倫

德星高照草堂明倫詩社新開竹院盟敏政白苧晚涼

湍走石蘭清風時至翠連楹倫不妨野老來爭席敏政

還着山童去洗觥蘭欲向中宵看月色倫試同吟榻聽

溪聲 敏政

次佩之汝巽登齊雲岩聯句詩韻

倚天青屨顏萬古一幻化斗參將可捫雷雨或在下龍  
潭深叵測虬木怪相亞兩崖神斧斷危壑鬼工駕峯筍  
拔地出石髓裊空瀉名爭武當勝德可祝融媿劔鋒秋  
發銅寶氣夕騰價真祠故起宋禹蹟漏書夏帝遊雙鳳  
駢仙來五羊跨心慳孫綽賦目窘李成畫雲深鷄戒晨  
風急虎司夜磅礴奠茲土陰晴憫子稼延生丹幾熟保

境旗載馮憑虛疑蛻骨逃暑如拜赦輿論小吳粵誰詩  
敵衡華我病慚二疏君才薄三謝共此樂谿山陋彼事  
田舍爭席從雅俗掉鞅笑茶蔗文旆驚忽淹朝簪久同  
卸登陟吾屢嘗厭飫子今乍倚徒誠多竒應接恐難暇  
守洞沙鹿嬉獻果野獷迓便當隨所之那復俟休假醉  
招獨鶴俱吟遣六丁詫作銘鐫薤書削壁補苔罅千里  
渺雙鴈萬竅同一喑留宿分霧幌歸袖揖風榭喜有黃  
庭堅鷄壇正堪藉

別佩之用其韻

才看一笑同林下不奈餘年總病中  
雲路脫銜容棄馬雪泥留爪憶飛鴻  
隨身劍在君猶壯擊節詩成我未雄  
今夜綠筠堂上月便應分彩照西東

萬壽聖節隨班行禮後廷貢堯子倡和有詩因  
次其韻

鸞旂交匝錦雲飛嵩祝聲中暑氣微  
萬里北辰遙在望一星南極正流輝  
閒身再入新陪位病骨深慙舊賜衣

聖學日增天下慶餘生此外更何祈

古朴行

祁南古朴大十圍樹身竒壯識者稀日光亭午不到地  
遠望一冪青巍巍汪家世來住此下萬綠叢中連大厦  
往來喬木認朱門賓客如雲繫車馬撫樹生男幾百春  
有老一生今逸民性資古朴如此樹高卧自謂羲皇人  
六十年來頭未白對樹稱觴春拍拍名園紅紫易銷沈  
何羨長安五侯宅構材堅比檀木良結子甘若胡麻香

知君食實更怡老坐使百年筋骨強我翻古朴行長歌  
祝君壽安期羨門亦何有願言盡返古朴風與君同作  
康衢翁

祁門汪處士以望世居縣南朴樹下為名族相傳傍  
有古朴一株甚大今其樹之子孫益茂而族益蕃迨  
處士尤性朴好文為一鄉善人年甫六十而歲之六  
月廿九日其誕辰也予與處士之子儒學生機相往  
還甚厚且聞朴樹其本類檀而堅其實類麻而甘蓋



嘉種也因賦詩一篇壽處士而寄情于朴如此云

有客餽子竒石置庭前盆池意甚愛之一夕被  
人竊去悵然賦詩且以自慰

何人瞰我碧玲瓏昇去潛隨五夜風石髮尚餘粘甕口  
雲根無復寄牆東愛山正爾清非盜撫景何妨色是空  
王屋太行今在否欲題新札問愚公

題歸隱卷

載將風月滿船歸多少田園誓自違夾路漁樵驚識面

入門兒女笑牽衣家山勝似黃泥坂村酒香于采石磯  
老向太平吾與子却因佳句憶玄暉

此商山吳君士愷歸隱卷也卷中作者若宗堯侍講  
華伯郎中公綬侍御子靜隱君多巴下世漫讀一過  
不勝黯然因用公綬舊韻賦一律歸之

贈輪老

江樓高處月明時大地山河渺一絲天上水中誰是幻  
倚闌須問法輪師

汪進之為予言圓通寺有水月樓甚奇勝寺主法輪上人亦高潔能詩可謂人境兩得矣上人嘗見予予不知其能此也別後作一轉語問訊他日徑造乘月登樓上人當何以語我

許生孝感卷

績溪許欽廷恭以孝事其親而獲三異之應人多稱之蓋其獲乎植物者再獲乎動物者一事雖微所以為悖親者戒則有大焉此予詩之不能已也

籬下黃花識孝廉薰風佳色為誰添相看亦有貞心在  
已耐寒霜復耐炎

右菊開五月

玉實纍纍帶露繁兩歧佳兆厭名園時新一薦玄臺下  
何必三牲慰九原

右芋秀兩歧

黃犬何來寂不詳撫時堪笑亦堪嗟莫將偶爾輕人者  
無限街頭肉食家

右隣犬自馴

寄方軫隱君

徵書聞不到丘園我亦年來厭世諠何日與君同杖策

張公山下看江源

聞有司罷冠帶之格  
故首句及之發一笑

八月六日至南山悵然興懷因就葺整書冊賦

此

秋來久不到東阡獨坐虛堂思杳然隨處粟田仍望雨  
滿牆詩板忽經年解牛未悟偷生妙辟蠹聊持討罪權

關九字

預掃竹床眠

與廷貢汰萬夢吉步至新竹園

卜居何許最心降十畝蒼雲繞石缸  
遠響暗中聞絕壑

茂林疎處見澄江  
凌風擬著亭當逕  
攬翠時分榻近窓  
瓦缶一醅秋正熟  
計誰來訪鹿門龐

雨中自郡城歸至巖鎮承謝廷懋廷彝廷馨昆  
仲款留夜與壩子聯句置屋壁用酬雅意且

紀歲月云

十里青山冒雨來  
老人謝家留宿一樽開  
舉頭忽見雲

穿月壩側耳遙驚水激雷  
坐久燭花如慰客  
老人飲餘

詩草愧非才  
夜深侍寢秋堂上  
壩笑記窮途又一回  
老

人

中秋夜

一片清光不世情，故鄉寧弱宦鄉明。  
風前欲動金波影，雲外疑聞玉臼聲。  
多病暫開新酒禁，古人都落幾詩評。  
陰晴向爾難相料，不惜留連到五更。

早過山下有感

春花秋月兩相凌，隨處青山興便乘。  
卷裏好詩圖上景，半歸邱隴半歸僧。

題吳世良遜齋卷

終身讓步不枉百一忿忘親真大惑眼中能遜屬伊誰  
萬古讓王稱至德三吳故地多王孫新安亦數延陵村  
君家分住鴈溪上隱然喬木當高門大字濃書作齋扁  
祖德遥遥日星顯賈舶商車聲利場無競為心似君鮮  
軒堂處處嘉名新華實相符今幾人當仁不讓豈終遜  
學海茫茫須問津

鴈塘吳君世良以遜齋卷求一言予方抱病遜謝不



能而卷留山房頗久茲因徵急隨筆為賦此詩然亦  
不過老生常談耳豈足以副求益之意哉

輓程母項孺人

閔川程  
景之母

遙聞埋玉向青山塵夢那知更不還西母宴成身未老  
北堂機冷鬢初斑銘幽擬勒塋前石寫照空存鏡裏顏  
落日閔川悲令子朔風吹淚共潛潛

和答侶都憲

行臺喜讀眉山稿秀句來從建業城  
豸筆似爭蓮社樂

驪珠頻燭草堂明  
高懷便足降餘子  
多病真輸老半生  
徙倚石闌遙送目  
停雲無限別來情

向聞愛看坡詩  
近觀來篇格律大進  
且妙得長公三  
昧然非具眼者  
莫識也健美之餘  
得五十六字少見  
意云

竹園宴集分得築亭限韻

十畝篔簹翠作堆  
箇中宜著小亭開  
坐間正挹雙溪水  
行處中分一逕苔  
清愛四圍鳴劔筑  
貴慙平地起樓臺

願言長作林泉主一任諸公載酒來

秋日雜興二十首

溪堂客散後敗葉鳴秋雨幽人讀易罷孤坐妙無語紛  
紛雀爭叢噉噉鴈投渚羲馭何停機新涼忽如許掩關  
一欣然驚心向來暑

矮屋南山下喜與客分眠就中二三子去住長依然為  
別忽云久見我驚華顛李生閱兩載程郎踰十年呼童  
下塵榻共讀招隱篇喜極欲忘寐明月窺前川

偶誦壁間詩歲月如過鳥故人幾離合使我心杳杳今  
年病稍寬逸思凌八表澄江翠成帶遠岫青未了平生  
行樂地孰謂知音少落日漁樵人長歌出林杪

吾友汪彖史昔以忠見尤遠謫天萬里攜家上黃牛十  
年始相面未覺霜毛秋兒女百世緣晚晚三日留離筵  
酒一卮坐俯寒江流去住意難極聽我歌遠遊我雖稅  
塵鞅敢謝蒼生憂

雜住縣南郭懷抱長不開晝厭市井喧夜苦更漏催所

以溪上村欣然自裛迴起居得靜安好客時一來開門  
俯脩竹移石坐古苔嘯歌待山月猿鳥無驚猜幽栖老  
亦足擾擾何為哉

去年黃叔度賞我霜中春對酒得佳詠和者三四人居  
然考槃樂宛若桑榆親嘉會亦難偶相望如隔晨西風  
忽夜作感此白髮親幽花不相負采采清溪濱

客有宋逸清瘦勁如立鶴醉唱青天歌勢欲上寥廓適  
來絕葷飲語我以靜樂俯仰天地間相期在林壑朝看

沙草青暮嘆巖花落人生幾何時朱顏不如昨行當啓  
瑤壇分我九還藥

斷石鎖上遊古城當外屏我屋居其間上下得幽境當  
時結吟社長日領詩景就中張文昌才情更苦穎

南山古蘭若正據清溪潄牆東有嘉木下蔽一畝陰每  
當三伏來涼吹如秋深餘年復多病困彼炎燬侵野僧  
相後先時來滌煩心金飈動地至蕭蕭但空林炎涼亦  
偶爾倚樹成孤吟

我愛向子平所志畢婚嫁放志遊名山觸目窺大化此  
公亦高人孰可攀逸駕世緣幸粗了農事更多暇周覽  
須及時胡為草堂下

轟轟張公山下有澗溪水東流匯桐江到海清且駛我  
欲窮其源洗此雙曠耳一斟毛骨寒再酌沉疴起蛩然  
俯空翠坐弄石齒齒不有仁峯生同誰擷芳芷

偶開溪上園中有竹萬箇誅茅蒼翠間永日成獨坐涼  
颺何脩脩流水松下過幽人期不來新詩聽誰和

在昔黃古林不作近代語印我梅臯篇直欲諧鼎呂平生更寡合所至恒獨處侃侃憂世心戚戚老羈旅空持菊花尊宿草今幾許有懷無與言西風動林墅

率口幽絕處風光似斜川上有數椽屋下有百畝蓮阿咸頗知道閉戶攻遺編我欲往共之乘秋弄清漣預買一葉舟擊節相洄沿靜窺魚鳥樂庶以窮吾年

往者鬱不樂駕言作郊遊蘿山若老龍一尾蟠荒陬蕭蕭佛舍古隱隱溪亭幽引躅日西下與客仍淹留邇來



得嘉墅竹樹環清流此山適當門周覽無外求乃知天  
與竒坐享非人謀眼中漸黃落曠野來高秋折簡塵外  
侶相隨豁吟眸

吾宗有貞君尚友千載士我方直承明相督返桑梓至  
人炳幾先達者貴知止悵望溪上雲卑歌念君子

戴生少也敏汪生壯而瞻適茲丹桂秋所挾堪一薦老  
懷豈足此古學宜不勌春花寧非榮紅紫競相絢礪松  
青入雲不受雪霜變勗哉爾同人歲月若驚電仰止紫

陽峯魏魏望中見

曉入水南道老翁泣且行撫膺向客言病與貧相仍前  
夏麥告荒今秋粟無成里胥劇星火追呼責官征感之  
三嘆息竚立難為情我食日幾許憫此嗷嗷聲皇天視  
聽遠孰與安其生

雲巖一萬仞上有玄帝宮洞穴何磴硤疑與天墀通神  
輦向夜出肅肅來陰風下土蟻蟲臣稽首空濛中願開  
赫赫威四顧悲人窮偃旗作雷雨叱劍行龜龍我當頌

帝力擊壤歌年豐

平生兩畏友高風邈難攀  
浩浩張東白巍巍莊定山  
連枉尺素書遠到溪堂間  
欲上軒轅峯更俯硃砂灣  
盡日騁南望呼童候柴關  
安得命車至一覩水雪顏  
臨風重延佇目送江雲還

和氣致祥卷為黃州劉太守敬之賦次其韻

長養無煩九夏風  
瑞榴寧與野芳同  
根涵勺水凝烟碧  
花映窓紗濯露紅  
郡客屢聞開盛賞  
園丁何敢策新功

玄都再入非虛兆名節班資看兩崇

右折榴開花

鈴齋傳盛事春意着寒餅瑞牒徵劉寵詩郵到管寧老  
枝疎綴白佳實亂垂青多少閒花木勾萌待迅霆

右折梅結實

追輓故少保贈太傅于肅愍公夢中作

太息于公不可追曾因多難拯邦危斗間忠義精難泯  
地下權奸骨已萎公議到頭聞卹典世情翻手似圍碁

不知誰撰新祠記可比當時岳廟碑

壬子歲八月晦夜不能寐至三鼓始就寢頃之夢作  
一詩哀故少保于公又頃之寤而記其全篇不遺一  
字即呼室人語之故蓋不知其何感也予以公之忠  
憤未白屢語其子京兆君景瞻俾陳于朝不果暨予  
歸田始克有請獲贈諡廟食之典以書報予山中豈  
予心恒惻惻于是故不忘于夢寐之間因遂有此作  
耶予平生夢中詩既寤即忘而此詩獨了了不遺是

誠可謂異矣將書以遺京兆君而特記其事如此

九日斷石登高

何處登高把一盃青山磯上舊溪臺半崖薜荔詩龕在  
兩岸芙蓉畫障開隨地更尋佳菊賞野人爭喜病夫來  
西風落帽身長健短髮蕭蕭亦快哉

自斷石與司訓黃倫汝彞及親契汪錠克成族  
孫乙汰萬並載竹筏泐溪泛至流塘飲磨貴  
存中家道中聯句五首

一樽溪上作重陽篁墩醉舞伊誰似我狂倫石面風來

頻正帽貴崖前露滴細沾裳乙尋幽學士詩如畫鏡借

渡樵人筏勝航篁墩千古牛山堪一笑倫登高何必嘆

流光貴

天將翠竹載青山倫秋興都歸嘯詠間乙隔岸漁歌來

款乃鏡出城遊客愛孱顏篁墩乾坤真景森然列倫水

石閒心偶爾闕貴醉倚斜陽歸未得乙隱居思近落星

灣篁墩

重陽多雨喜今晴貴遠渡人從鏡裏行乙一路青山如

送客鏡幾家黃菊待尋盟篁墩眼中誰有登高賦倫雲

外時聞伐木聲乙無酒淵明偏愛飲貴四郊香秫正秋

成篁墩

九日來登落石臺乙山開罨畫水縈迴鏡一尊何待白

衣送篁墩兩屐新凌翠嶽回倫鷗鳥有情閒對席貴詩

題無數半封苔乙滄浪一曲悠然去鏡不數悲秋宋玉

才篁墩



我愛重陽菊盛開錠水村隨處踏秋來篁墩峯高萬仞

堪遊目倫石湧雙拳可送盃乙危磴斷雲粘屐齒貴老

松圓露滴珠胎錠便須重作溪亭主篁墩分席慚無入

社才倫

九日宿存中家明日與汝曩汰萬同登其屋南

### 感鐘山

唐人有詩記端六我今十日來登高江山如此不為樂  
正使達士譏吾曹青天無風亦無雨處處黃花照江渚

花開一日未便休日重陽豈虛語人生良會不可常  
謫仙痛飲非真狂願言勝會自今始踏遍秋風千仞崗

雙鷹圖次韻

爽然神俊立秋風曾入鷹師百購中一出便能驚雉兔  
並遊誰解識雌雄黃雲塞遠呼聲急碧海霜來照影空  
總道上林新罷獵寰區贏得謝條籠

和答河間李主事旦

旦以言事  
除名家居

伏臘年來儘可支雞栖豚柵擁茅茨病魔却苦無虛日

酒量那能及往時一任野翁閒競席幾將衰髮笑臨池  
飲情只有看山約百遍相招總不辭

欲返瀛東力未支天涯相望一茅茨逢人話到桑麻後  
羨子書言社稷時開選不當馳馬地濯纓誰共狎鷗池  
他年徑造非生客寄語山童莫漫辭

林泉清趣卷為古林黃思復題

散髮長林下洗耳清泉中黃君亦佳士不霑遊冶叢得  
句寫松雨呼酒翻荷風未覺白日晚正喜紅塵空人生

穹壤間所樂恒不同擾擾雞鶩場伊誰識冥鴻我方駕  
黃犢世網不受籠浩渺寒溪灣上有一畝宮掬水飲真  
味種樹歌新功君當入吾社漁牧隨西東

九月廿八日黃司訓汝爨雨中留宿聯句二首

雨為留人作意長程尊前吟思正飛揚先生百中真常

事黃博士高歌豈大狂銀燭有花如獻捷程玉堂無地

不生香一時未定千年論黃起聽山城漏未央程

景行自是百年心黃我亦逢君語便深客去共聽秋夜

雨程坐來獨怯暮天砧文章價在何時定黃山水情多  
逐處尋斗室初成先下榻程愧非徐孺汗沾襟黃

小齋初成喜承之彥夫天爵敬之師魯踵至值  
冬霖累日不止舉酒相屬以來雨名吾齋分

得蓬字

背起茅堂曲逕通故人連喜一尊同閉門十日驚新雨  
下榻千年愧古風芸几近窓山翠濕竹籬遮院市塵空  
巢居莫忘論心處多少泥塗嘆轉蓬

十月十三日雨中飲長汀寺

古寺今來感慨多，更禁寒雨下庭柯。  
屋經野火餘金象，簾捲山嵐出翠螺。  
問訊禪床僧已老，摩挲詩案客重過。  
茅堂祇隔青溪外，莫厭時時到薜蘿。

仆碑行

貞觀仆碑緣入譖，元祐仆碑讒更甚。  
太平再致伊誰功，後有溫公前鄭公。  
平生富貴若土苴，取秩停昏何啻豐。  
懲情納忠真力假，紹述遑譏綴旒者。  
遼東兵敗金人來。

口碑一日高崔嵬

寄墨與淳安新舉子族孫文楷

玄霜新品出杉蘿  
馳贈名郎寄意多  
聽取染毫丹陛下  
龍蛇飛影試如何

南山精舍理書一月得三萬餘卷喜而有作寄

王宗植

敢道勲名似鄴侯  
牙籤三萬偶同儔  
古人可作惟香蠹  
坐客相驚欲汗牛  
宦海本無經濟策  
硯田聊為子孫謀

老天玉我成書癖莫怪從今不下樓

慶宣和行住坐卧卷

銀屏金屋逞驕奢利鎖堪嗟杏花村落酒中賒行此  
些

三邊玉帳擁雕戈汗馬奔波竹籬茅舍小行窩住麼  
麼

香車寶馬洛陽街滿面塵埃芙蓉秋水釣魚臺坐來  
坐來



五更風雪候趨朝玉漏迢迢紙窓明月上梅梢睡著睡  
著

人月圓為人寄壽錢塘王嘉瑞

故孔目天與之孫

錢塘江繞吳山翠相望隔天涯鎮海竒觀泛瀾佳興盡  
屬誰家 聞說王郎翰林孫子四十年華遙想同人一  
回相壽幾醉流霞

孫閱風竹為師魯題

孫郎寫竹有天趣落筆蕭蕭一兩枝六月相看北窓下

滿身毛骨動涼颼

訥軒為富溪宗人道宣賦

白圭重三復金人亦三緘如何嗇夫輩利口矜詆誦多  
君素溥樸玉立青巉巉以訥署齋扁豈為憂譏讒非法  
炳明訓琅琅若英咸慎哉一言出謹爾六轡銜進德匪  
自此云胡分聖凡軒居北山下天籟多風杉安得寡尤  
者為子銘高巖

和答吉安顧天錫太守同年

籬菊新黃百草枯  
天涯相憶共朝晡  
一絨秀句題鈴閣  
千里虹光射鏡湖  
致主有才淹老守  
全身無策笑庸夫  
喜聞述職行將近  
幾日風帆過直沽

雪後至南山精舍

為貪竒賞到山齋  
玉樹琪花擁斷崖  
淪茗半宵勤瓦鼎  
採梅今日試芒鞋  
來年沃衍占豐歲  
塵土清空愜素懷  
白戰舊盟誰願續  
一尊同此繫詩牌

一剪梅慶鄭君存良七十壽

喬木江村映錦沙尚義人家積善生涯畫堂開宴鼓頻  
過砌擁蘭芽鬢點霜華輝輝晴日上簷牙詞吐天葩  
酒泛流霞百年冰玉兩無瑕醉眼生花仙棗如瓜

月波樓為吳孟實題

遙天無片雲溪水蔭清樾誰開溪上樓早見溪上月恍  
然冰壺中湧此爛銀闕主人時獨來水鳥聲乍歇橘林  
晚霜過荷泫微風發晴峯遠相帶隱隱青一髮水天蕩  
無垠斗柄正高揭憑闌擊唾壺神爽已飛越我欲往從

之乘夜泛漁筏一笑捲疎簾促席共薇蕨酒力清易醒  
詩懷浩難竭入眼竹洲寒何時解塵襪

椿萱圖為祁門方鏗賦

堂前椿樹盤根久千歲常期大人壽春風蝶夢早匆匆  
一事無憑漆園叟堂北紫萱娛白頭對花日日思忘憂  
宜男已壯母何在贏得臨風雙淚流方家郎君湖海客  
春雨秋霜心惻惻憑誰貌入丹青中猶似升堂候顏色  
我觀椿萱圖為作椿萱歌天桃穠李空復多寫生縱有

黃荃筆風教無關知奈何

篁墩文集卷八十七

欽定四庫全書

篁墩文集卷八十八

明 程敏政 撰

詩

十二月廿一日得旨昭雪復官感激賦此

紫鳳銜書下九霄君王還念舊宮僚  
春回大地陽初動日轉陰崖雪盡消  
犬馬有情終戀主山林無分又趨朝  
旁人欲問酬恩事洛黨塵編未寂寥

耕讀遺民為富溪宗人彥旻賦

雞峯渺何許下有衡門翁朝耕事拮据夜讀如顛蒙不  
慕萬鍾祿安此一畝宮逍遙斯世間綽有先民風北顧  
仰草野南征憶隆中躬稼樂古道致主成元功聖賢今  
已遠出處孰可同潔身愛徐君遺安得龐公毛髮久云  
變兒孫亦成叢代耕復勝讀世態從汙隆恒產蔚有秋  
陳編浩無窮何當挾冊往一與歌年豐

富溪宗人彥旻君力學好古自號耕讀遺民其子正  
思從子遊嘗請予一言予病未能也今年秋病愈始



克賦古詩一章以寄之且將挾青編駕黃犢訪君子  
雞峯之下而召命遄至將不免于北山之移有愧君  
矣雖然宦轍無憑岩壑在望則與君訂晏歲之盟固  
未晚也

題臨川曹庭瑞愛蘭卷

口談祿命似君平相見無勞問姓名手弄國香詩滿把  
已應人識愛蘭生

紫蕤熒熒翠莖長不是當年九畹香願子佩時須拭目

野花山草正芬芳

臨川曹庭瑞奉其父宗器談祿命于休寧多奇中宗  
器預言予退庭瑞預言予進皆其驗者庭瑞以愛蘭  
自名求一言值予方被召入朝為賦二絕朱子注楚  
詞謂蘭即零陵香也今人說蘭殊與此異因并之

除夜家燕聽壎子鼓琴

山鄉明日是新年壽母情深夜不眠  
耳畔莫嫌無管籥  
小兒初解拂冰絃

南山梅盛開以將北行不得賞立春始克至  
精舍與客夜飲聽逸清歌上清詞有作

許時不到山中來今日賞春兼賞梅苦於日落未成句  
直到燈前方舉盃投閒得忙博一笑北去南來經幾回  
道人為歌白雪曲塵累擾擾何時開

壽績溪宗人景貴八十

雙瞳如水雪垂肩才及非熊應兆年上世黑頭曾入相  
平生丹訣笑求仙東風送暖開仁里南極流輝落壽筵

從十到千應可數為君先賦大椿篇

績溪仁里程氏出宋丞相文清公後多賢子孫若今  
處士景貴君尤賢有子曰康績學待用而其姪傳以  
令尹致政家居來告曰景貴壽八十伊始正月十二  
日誕辰也敢請一言予與君族兄弟嘗識君方被命  
入朝行李介道不得舉一觴為歟迺賦此致壽意云

題殷氏東溪泛舟卷

雨過東溪好放船四山如黛水如烟風前細檢逋詩卷

撫景悠悠十二年

解潭風物定如何南北驅馳歲月多  
此日又從塵裏去  
幾時來賦濯纓歌

項里殷君時雍當成化壬寅歲以東溪泛舟卷求詩  
時予方起復北上居京師七年被放南歸家居五年  
予不暇作君亦不暇取也茲予又將奉召北上檢點  
詩通計終不可無一言乃賦二絕歸之稽緩太甚既  
以自咎亦以自笑云

題吳氏知止卷

大江風息好收船莫待魏魏浪拍天戒險不慚三讓喬  
為君思詠卜居篇

隆阜吳君九雲以知止自名實有取于老氏不殆之  
義說者多反之蓋將以聖賢大學之道勗君也子竊  
以為不然老氏此語亦可為進不知退得不知喪者  
之戒未可深非也君子不以人廢言故賦此詩以不  
失君之初意焉

題公明姪江湖覽勝卷

江湖風景最宜人北去南來不厭頻長遣一身安素舸  
肯將雙足浣黃塵鷗邊芳草詩城遠鳥外青山畫障新  
收卷付君還自哂又隨徵節上征輪

李白問月圖為巡按吳天弘侍御賦

山東李白真王孫天才逸若天馬奔醉中雙眼俯八極  
弄月似扣玻璃盤安得長江化春酒詩成百篇供一斗  
拔取蟾宮玉兔毫為副金鑿草麻手江月空明山月高

停盃一問歌聲豪  
賀監歸湖郭  
今遠寂寞當時宮錦袍  
文章萬古光不歇  
過眼清光幾圓缺  
世間欲訪謫仙人  
煜煜長庚皎如月

膽餅梅為邵用珍賦

雪後山窓讀易時  
膽餅清曉見冰澌  
老人坐悟先天理  
無限春光在一枝

題虎圖

一嘯風生百草枯  
陰霾消處見於菟  
眼中頗覺妖狐靜



不道相看是畫圖

廿五日北上留別鄉友

吾道行藏貴有名分甘丘壑了餘生世臣恩重須仍出  
廷議公多久更明東壁圖書客再閱北山猿鶴愧初盟  
非才何力勝君名館閣江湖只寸誠

壽岩寺方彥仁

高年從昔數方瞳近識多君一笑中六十健來堪走馬  
百千人裏羨冥鴻靈椿影蔭庭心綠辣桂香傳蓋面紅

壽筭不須盤甲子古岩家世漢仙翁

題宋王晉卿畫鷺

獵獵風吹蘆葉黃  
瑤鷹如雪點江鄉  
鈎簾素壁看摹本  
想見當時寶繪堂

登歛學歲寒亭和舊韻錄寄巖鎮汪君士和

子曜

歛學  
生

隱隱長松帶石屏  
小亭仍揭歲寒名  
古碑字滅苔爭繡  
曲徑人稀草亂生  
松老不隨霜雪變  
景多真比畫圖清

憑闌小立斜陽裏春鳥初聞第一聲

訪進士何斯復于歛北黃荆渡不值時斯復方

以養親告歸

問路尋君徑出城過橋自得繞溪行小翻翠柳東風軟  
返射青山夕照明為就江魚長供母斲容沙鳥一尋盟  
前村種藥歸應晚欲話心期恐未成

過淳安拜大司空胡公于里第別後奉寄

玉立長身海鶴姿歸來誰得健如斯了無俗氣侵懷抱

才見青霜點鬢絲優寵再看綸誥出高情不改布衣時  
朝廷次第收耆舊擬有人賡慶厯詩

走往來淳安進謁大司空先生于里第每拜益健今  
茲之來適聞特恩賜誥褒德有加知嗣聖之眷方隆  
而老臣有重徵之典天下之慶也謹成鄙詩一章少  
致鄉仰之忱萬一云爾

題致政應文貞典寶山水

出門便見好溪山却為丹青一破顏想是宦途雙足倦

高情長在卧遊間

題白頭翁

蓮塘十畝動涼颼  
水鳥閒忙任所之  
對畫主人無一事  
功名真到白頭時

二月六日睦州城東遇雨野泊雜言一首

東風日夕至倚棹桐江  
潏潏打篷雨渺然動羈心  
老夫起讀易小兒坐鳴琴  
相隨二三子一笑開煩襟  
山家隔溪渚上有青竹林  
依依出烟火閣閣飛沙禽  
他鄉忽

值此頗似南山岑人生若萍梗况彼霜毛侵臨流發孤  
嘯極目江雲深

嚴先生祠

光武以子陵不受官仍命有司供諫議祿終身子  
陵亦受之以全其好賢養老之美皆近古未有也  
不作中興諫議臣歸來仍許祿終身要令公相慚台鼎  
正為先生樂釣綸黃鵠遡風非漫士赤龍當極是真人  
雨中未得供蘋藻一日乘潮入富春

赤松山

碧霄千仞赤松山，悵望仙蹤不可攀。  
直擬御風遊海島，肯來隨俗住人寰。  
天桃一樹野烟裏，老鶴數聲空翠間。  
辟穀有靈應笑我，塵中雙足幾時還。

飯道旁定明寺

竹籬雙戶對山開，何代精藍跡未灰。  
僧苦自為征稅長，地荒誰起曬經臺。  
匆匆一飯惟青菜，隱隱諸方半綠苔。  
落日未勝懷古意，聊題塵壁記曾來。

出清波門過淨慈寺飲于京兆先祠菴

一笑逢君似隔晨相違驚是五回春  
青峯湖上不改色白髮尊前無數新  
寢廟陰風瞻大老梵宮斜日下游人  
繞堤莫放籃輿速償我山中未了因

過杭次陸大參同年留別詩韻

風雨紛紛歲月催不堪行處送君回  
自應鷗鳥忘機事誰識龍媒本異才  
周覽試看雙目淨分攜聊與一尊開  
皇恩未謝塵纓在何日還容入社來



二月十四日李修撰子陽請飲江北陳家王修  
撰德輝在座

客裏欣逢兩狀頭東風三日繫蘭舟  
淞西何處春色好江北舊家池館幽  
醉任往來衝細雨情牽離合付新謳  
忽驚巷額題潘閔愧我無詩紀勝遊

北上過武林再會竹東劉君雖右手痿痺神采  
勝常酌別之頃因賦此竹東當倚歌而和之  
舟中把玩如故人之在眉睫也

誰道相如病不堪尊前一笑兩俱酣持螯有趣供豪飲  
捫虱無心事劇談執筆不妨聊任左奮身何必羨圖南  
杖藜穩作湖山主為子臨歧祝再三

王天祿侍御為玲姪寫山水便面

勇冠趣在丹青表公子情多山水中六月高堂不知暑  
向人隨手拂清風

駐船月洲亭下聞侶都憲將至暮雨有懷

艤棹江亭待故人闔閭城下雨如塵魚傳尺素來三月

柳繫離情管一春菜色可憐畿內地萍蹤難定客中身  
半生憂樂當何似篷底青燈坐及晨

鶴山書院兼祀周文襄公今總憲治所

聖門千載鶴山翁再拜庭前思不窮老檜尚疑舍古雪  
殘梅猶自領春風故鄉西望桑榆遠敕使南來俎豆豐  
入眼何人堪侑食計臣今數大司空

小飲承天寺為沈啟南題林和靖二帖上有謝

安撫印記

咸平處士骨已槁尺素誰傳雙鯉魚  
寶藏尚有安撫印遺藁元無封禪書  
人清併遣烏亦好字勁宛得梅之餘  
東風古寺拭卷目想像西湖雲水居

謁范文正公祠二首

廣庭端拜一塵無門外清溪點綠蕪  
三代偉人生慶厯千年遺廟託姑蘇  
淺夫敢竊先憂號盛德還徵後系圖  
徽國陋儒空仰止海峯高絕倚天孤

范家園脚步春風皎日英標在眼中  
銀杏十圍家廟古

玉粳千頃義莊豐身當文正無雙士手授中庸第一功

却走畫廊看翠碣朱絃三歎憶歐公

先祠前有銀杏數株甚巨蓋宋物也

走奉詔北上道出吳門伏謁文正祠下得閱忠宣恭  
獻諸遺像緬想高風敬賦二律寫貽公世孫從規用  
致鄉仰之萬一云

巡按趙侍御招飲憲臺清風亭

百舌聲中春意深小亭隨步晚登臨千年勝地姑蘇志  
一代清風御史箴傲歲花如圖上見樂池魚向鏡中沈

論文雅會匡時語不覺殘陽轉樹陰

侶都憲華誕和韻

栢府恩光錫命三蒼髯相對凜鬢髮軍聲舊遣戎王伏  
詩律高令漢吏慙秦岳炳靈分鄆上法星流彩映孤南  
一宵晤語如公瑾不待醇醪亦自酣

弘治癸丑春二月廿八日承都憲侶公招飲書院語  
間始知是日為公華誕之辰因舉酒相屬且用公自  
壽詩韻成詩一章少助頌聲萬一云

題倪氏子可竹卷

畢竟君可竹還應竹可君恨無醫俗句與子播清芬

崔孝婦封門朱存理求賦

紛紛勃磈者驚此孝姑名割股和羹進捐釵卜地成清  
河垂世範吳郡有鄉評撫卷三興歎周王化已行

虎頭記

勇角昔為吳郡守虎頭長贈長康孫居人一日知名字

請樂紛紛出封門

都憲劉公汝器守吳郡時嘗得疾值郡醫顧良貴而愈因以虎頭贈之予時自新安入朝目擊其事今十四年矣重會吳下為賦此詩用道其實云

題陸氏子終身之思卷

春色還青隴上枝春風難染鏡中絲只應孝子羹牆意  
一日長縈十二時

撫卷令人重陸郎思親情共海波長知君不是徒思者  
手葺云編幾架香



下塘陸君鉞因子所善沈石田先生以終身之思卷  
求題先生蓋亟稱其孝子諾之而匆匆未暇也鉞請  
以一人尾舟相候至毘陵始克為二絕畀之且引其  
意用相勉云

題華氏嚴埭舊業卷

先業淪他姓前當野水斜綠塍還舊物白稻長新花有  
共義民里無慙孝子家莫因心便得詩禮足生涯

予與守正別幾十餘年矣今歲始克會於閭門尾舟

相送過惠山舟中夜話出其嚴埭復業卷曰此我五世祖所業因兵燹廢去而予幸復之願賜一言予曰是誠可謂孝子不匱者矣惜予不工詩無以聲君之美聊具一律為羣玉之倡云

上巳日秦廷韶方伯與施彥清盛舜臣迓餞至  
惠山

倚棹尋源到薜蘿任催斜日下林柯遊人不減吳莊盛  
題字還疑宋刻多萬樹野紅真絢畫一泓寒淥未盈科

石牀他日如堪借來聽松風和醉歌

別君謙

萬卷芸香手自刪  
知予能撥冗中間  
吳門七日心難了  
直與殷勤過錫山

趙式畫芙蓉為鎮江高克明同知賦

霜葉紛紛醉不知  
名花全未覺開遲  
眼中何物丹青手  
解出秋江一段奇

很石行

今在闕  
武場內

北固山前兩拳石野花茫茫土花碧大如昂犬三尺強  
小似伏羔才一尺云當漢末風塵紅老瞞勢欲吞江東  
桓桓帝胄孫討虜並坐此石論雌雄想像時危屏人語  
慘澹風雲眇蛇鼠赤壁成功指顧中石上誰賓復誰主  
烏林一捷荊州分同獎王室叔奇勛小兒奸貪敗盟好  
舞智蹶我髯將軍漢鼎分明淪異姓質子封侯甘偽命  
可惜稜稜不解言恨入江聲寄餘興今逢一統天下王  
鐵甕城中開閱場將軍中峙列萬壘此君却在城東方

我來適過城下路停車摩挲日將暮欲從故老借圖經  
為爾臨風寫長賦

永慕卷

為鎮江鄭  
太守賦

百齡將近委天和累歲猶傳薤露歌譜在正分通德里  
名高宜入孝廉科蘋空南澗身刑遠蘭茁東風慶積多  
看取玉峯山下石貽封新表待重磨

飲趙夢麟郎中滄江別墅

瀟灑郎官住京口天性愛山如愛酒長浮一斗與山盟

所不愛山如此斗別墅正據滄江灣四望宛在丹青間  
虹月船空米老去悠悠世代空塵寰卽官作詩亦清好  
不遇酣歌不揮掃題徧山坳與水涯與客江頭幾傾倒  
我登滄江亭為賦滄江篇呼童更吸中濡泉臨風欲洗  
雙倦目他時來結山中緣

夢麟地官自號愛山子又號滄江別墅其懷抱清曠  
如此今獲解官鞅于壯年人固惜之而夢麟則可謂  
之自遂矣予北行得過別墅共飲甚樂因賦此詩而

行

古詩三十六句寄君謙儀部奉寓懷思雲山迢  
遙不我遐棄春鴻在望用僕好音

艤舟閭門下攬衣涉南濠居人愛楊子力任細書勞手  
校日弗給續晷焚其膏坐令書滿家一一排千旌麗藻  
并竒字史漢兼莊騷剖擊無終窮人徒識儀曹焉知漆  
雕意古學非時髦有如萬里鴻妙與江雲高又如幽蘭  
芳嫣然媚衡皋恭惟聖所傳慎此義利操明明君子心

道體求絲毛憂違樂乃行不負人中豪巨艦乘安流向  
爾空飛濤芸編亦自幸非君孰吾遭豈若夸毗子悻然  
立蓬蒿相去日已遠令我心鬱陶故人頗諧寡聊飲玉  
色醪題詩寄濠上臨風愧投桃

題吳天弘侍御畫菜

桔槔晝開春雨足采采新苗出畦綠就中一握晚菘香  
何許長安夸食肉栢臺清節世見希花鳥不愛丹青揮  
向來斷齏本同調下筋亦喜霜根肥此味分明吾所羨



此色寧堪上人面船窓撫景一題詩憂樂終歸濟時彥

高郵湖阻風

時雖開夾湖  
未能行舟

一陣狂飈入地垠客舟如葉浪如輪憑誰上訴由風伯  
任爾拋香拜水神阿岸稍卑思躍馬夾湖雖好未通人  
南來北去皆行役篷底從容莫漫嗔

都憲張公淮上所獲四印歌

予被召北行道出淮陰巡撫都憲張公汝器觴予  
言往歲奉敕濬漕河得古印四枚于楊子橋水中

已上進矣其一曰壽亭侯印其一曰鎮江府御前  
駐札都統制印其一曰鄂州管內觀察使印其一  
曰都巡檢使之印惟壽亭侯印為漢物人知之其  
餘莫之考也予因言壽亭侯印據傳記凡三四見  
于宋元間蓋後人追鑄以奉神者此恐其一也史  
稱韓世忠嘗為鎮江府御前駐札都統制岳飛嘗  
為鄂州管內觀察使此二印殆宋物歟都巡檢使  
亦宋官主捕盜賊以守臣兼領今不註其職守所

在莫知為誰矣語次得長詩一篇贈公用紀其事  
公與予同出河間進士同年予兄事之

行臺使者清河公濟川來往長淮東役夫走告得四印  
不知何代淪淵中盤螭結紐各異狀蘚包玉啣傷青銅  
自應神物不可闕月夕往往虛晴虹一朝昇出馮夷宮  
寶氣盡發清泠空行臺得之三歎息謂爾古器遭沙虫  
亂磨再使篆文出拂拭不遺纖塵蒙題絨頓首獻天子  
護以黃袱馱青驄近臣奉入歸御府想像白日回重瞳

我來艤棹淮水上十年相見驚秋蓬坐間傾倒忽語此  
便覺異代還英風憶昔中山啟炎祚絕世義勇稱髯翁  
斬王鄂王總人傑南渡百戰勲猷同當時遣使各賚賜  
尚方新鑄憑良工繫之尺組表異眷副以大纛兼彤弓  
豈知變故生肘腋斬地敗此中興功孫權心久附漢賊  
秦檜一力主和戎兩人伏劍徇王室霜飛六月愁蒼穹  
一人湖上跨長耳漫勞矰繳窺冥鴻都巡歲遠失姓氏  
無乃亦是千夫雄撫時感事數百載令人扼腕悲三忠

行臺於我同榜士呼酒更酌開蓮筒桑榆誼深談塵洽  
松韭味潔冰盤豐春風吹花助客醉解舟北去方匆匆  
海天回首推雙蓬淮流浩蕩山巖從為公高歌重懷古  
城樓一抹斜陽紅

過淮

清流如澗濁流黃有意交流不自妨斜月倚篷看水色  
薰猶誰道可同藏

百步洪次吳原博同寅韻贈馮主事

彭城西上一舟來  
柳岸春濤畫障開  
蘇墨在亭留琬琰  
梵宮當戶出樓臺  
風前艤棹生羈思  
洪上分司屬俊才  
欲借圖經詢古蹟  
何妨今日費刪裁

沽頭閘下歌

閘河無人節新水  
處處船頭閣船尾  
人生自古行路難  
咫尺直須論萬里  
去秋不雨今復春  
無麥無禾愁殺人  
朝來不忍倚篷看  
扶攜拍岸皆流民  
行河郎官不輕出  
舟困閘河無了日  
我舟雖困終須行  
奈此白日嗷嗷聲

留別濟寧周同守

憶在成都硯席同天涯相望幾秋鴻君生向我五年長  
行色困人三月中宦海積薪隨上下客途飄梗定西東  
艤舟不盡牽情處太白樓前柳絮風

先少保襄毅公在蜀藩時於庠序間最愛周君用中  
俾與予同學蓋三十餘年矣予被召北上值君自地  
官謫濟寧始獲胥會一叙疇昔恍然不知離合之久  
也爰賦一詩用紀歲月兼致別意云

題英雄奪錦圖

天外蒼鷹決雲下山麓玄熊亦驚咤錦雞勢落雙殼中  
草偃風回不容罅五羊趙王工羽毛水墨孰與林良高  
閒中作此有深意不用千錢歸水曹水曹世家原古歛  
三試場中三奏捷英雄奪錦人爭誇斯士斯圖正相協  
呼童啟軸懸中堂青春白日生輝光郢人燕說亦有道  
遠大相期君莫忘

予北上過濟寧水部主事程君廷臣以此畫索題君



之先實自新安遷上饒者譜牒具在可攷也匆匆為賦此詩亦將以訂宗盟云爾

八里灣復會亞卿同行至開河驛始別

客路重逢喜倍增  
幾人相好是心朋  
愛君才似雞羣鶴  
笑我船同驥尾蠅  
別思漸濃頻喚酒  
和章難續更挑燈  
薰風有約陪鴛序  
忠告時時得敬承

朱憲副恩壽堂

一堂曾記壽魚恩  
八載相聞齒更尊  
不叩仙方延歲月

只將公廩奉晨昏推封日下登三品衍慶年來見十孫  
大手特書應未了綠槐如幄蔭高門

山東憲副朱君朝用為侍御時予嘗記其恩壽堂今  
十年矣再會東昌出閱是卷則知其具慶無恙樂有  
十孫而君方預憲使之選恩與壽偕不日有也君請  
再賦一詩以申其說因輒附此致期望之意云

管太僕同年出示往年登樓之作別後次韻奉

寄

留題高閣四周星詩味那能敵  
非萍驅我不情塵滾滾  
向人無恙柳青青  
彈碁敗却心仍喜  
讀易精來體自醒  
夜倚船窓憶故友  
不知風雨透虛櫺

舟中病請醫者劉宗祐與俱至德州贈別

臨清河下識劉郎  
脉理名家本鳳陽  
語次愛君醫術正  
行邊寬我客愁長  
丹溪自喜傳新學  
金匱何須說異方  
坐想到門應幾日  
薰風吹滿杏林香

李源十景

祁門李生彥夫所居李源最幽勝嘗析其景為十  
求予詩數年矣病未能賦也北上道中阻風連窩  
塊坐無事因各為五言一絕以寄之雖短章寂寥  
不足以盡景之萬一而其大致亦不出此矣

天井龍痕

潛龍卧空山爪印非斧琢一日風雷生終當露頭角

軍灘馬跡

義兵昔來過石上馬蹄在遺響寄灘聲英風凜何代

鑑塘活水

一鏡含天光源頭自何許悠悠川上心臨流共誰語

斗峽迴瀾

兩崖忽中分驚浪凡幾折相期避暑來薰風洒飛雪

蓮亭小雨

雨落芙蓉塘一陣香冉冉瀟洒亭中人紅塵不相染

竹逕清風

夾道千琅玕森森出牆外有時一輪秋平空發天籟

筆架凌雲

三峯上排雲競秀如筆格千古兆人文知非草玄宅

誥軸橫空

一峯如誥身隱隱當戶見山靈知主人終為漢庭彥

溪流晚棹

閒登溪上樓返照射溪水何處榜聲來前灘白鷗起

山礪朝春

雲碓倚東隴遠響一洲隔空林烟火生晨炊待香白

壽汪文好

當年開社見南山曾共從容一日閒  
老我半生頭已白  
喜君五十鬢無斑衣翻晴彩生春意  
酒瀉秋莖動醉顏  
正欲登堂陪賀客又隨丹詔上朝班

天津提督兵備劉天祐憲副留飲席上聯句三首

尊酒初逢海上城敏政真須傾耳聽韶英  
陰雲釀雨窓  
含暝福曲岸留人柳颺晴  
兵衛夜聞談麈洽敏政官河

風便去帆輕玉堂新寵金蓮炬福供奉無能愧此行敏

政

三十年前飲令名福天涯離合漫相驚喜君憲節新開

府敏政愧我詩壇始結盟蘭麝清風薰滿座福杭蠶美

俗動諸營倚闌更有淹留地敏政明日登樓一送行福

燈前談笑客忘歸敏政分付奚奴為掩扉好句每從沈

醉後福離情偏惜故交稀月明坐嘯潮生浦敏政漏盡

驚看酒濕衣邏卒隔牆喧警柝福旅懷臨別更依依敏



政

拱北樓

在天津城上  
劉憲副所建

危樓突兀中天起，雄峙高城壓諸壘。  
登樓北望空濛間，正距皇都三百里。  
直沽東去當海門，九河下瀉鯨濤奔。  
一道科徵比州縣，十連虎豹分營屯。  
天子端居不忘武，敕遣提刑此開府。  
眼中壯觀忽歸然，緩帶時來閱干櫓。  
四方玉帛趨神京，千車萬舶無留行。  
題品休歌太行路，麗譙却數天津城。  
憶昔文皇曾駐蹕，父老相傳至今日。

憲臣初下新條章宿將誰諳舊軍律城頭大旆翻晴紅  
城邊細柳搖薰風我來徙倚不能去宸居宛在紅雲中  
畫角悠揚鼓聲壯雉堞嵯峨日初上掀髯聽講陰符篇  
誰道儒生不堪將檻外滔滔河水流酒酣擊節歌新樓  
盛年相與赤心在范公敢謝蒼生憂

與林泉

歧路塵埃滿髮絲坐憐沙柳綠參差停舟奉筆延佳興  
不道林郎亦愛詩

杭州林泉為漕舟什五長隨予入京至河西務忽奉  
紙拜乞一言因賦此絕

四月初六日楊村道中遇暴風野泊入夜尤甚  
舟人大恐皆不寐待旦燈下有感

黃沙如霧晝冥冥一夜狂飈吼不停何物陽侯翻地軸  
有時風伯畏天刑盜窺客舫懸孤注神忌吾書走六丁  
篷底故鄉應入夢清溪脩竹舊岩扃

都城道中憩永明寺次壁上留題韻

箇箇僧房密真如百鳥窩經翻梵語亂詩掩壁塵多渴  
吻思清供憂心苦旱魔誰銘堂下石聊為一摩挲

與劉舍人

憲府封章入奏頻春風隨路畫船新將家子弟能將命  
多少三吳待哺人

一舟同日發姑蘇千里相隨達帝都情重汪倫能送我  
我詩還似謫仙無

吳下歲侵都憲侶公遣劉舍人賫奏入朝適予方被

名北上因相子行一路勤慎可喜拜辭之際求一言  
草草賦此



篁墩文集卷八十八

欽定四庫全書

集部

篋墩文集卷

八十九至九十一

詳校官編修臣李堯棟

中書臣劉源溥覆勘

總校官進士臣朱鈐

校對官監丞臣張曾炳

謄錄監生臣錢萬選

欽定四庫全書

篁墩文集卷八十九

明 程敏政 撰

詩

五月一日復經筵日講簡廉伯賓之二學士  
隨鑿復入殿東門淺薄將何答異恩去國不知三載過  
傳家猶幸一經存聖顏屢顧驚華髮尚食仍饜醉綠尊  
詞苑故人天下士別來佳話得重論

送門生江寧徐夢麟赴會稽教諭



教鐸分持客棹輕  
青年文采屬徐生  
會稽山水占鵬運  
建業衣冠起鹿鳴  
殷序暫為丁祭主  
漢庭終擬甲科名  
我來子去匆匆裏  
不盡沙頭酒一行

送涂邦祥修撰省親還南海

彩舟遙指尉佗城  
一路恩光送客行  
憲廟紀成勞太史  
禮闈文出羨諸生  
鵝黃酒熟承顏好  
獸錦袍新綉目明  
回首五雲歸及早  
衣冠相約候延英

送武選徐仲山郎中赴廣東參政專理餉事

長才真合佐名藩一日金緋荷主恩  
遙奉圖書專餉饋  
久持銓法試橐鞬嶺南父老先知姓  
吳下山川正過門  
兵後瘡痍應未復聽君膏澤慰黎元

五月十二日騎馬北城堤上有感

北郭薰風散馬蹄綠楊千樹水禽啼  
蓬萊擁翠承金闕  
太液分香繞玉堤去國不知人老大  
臨流還識路東西  
紅塵白髮詩情減緩策吟成日向低

送司馬公鞞赴長洲訓導

而翁提學久馳聲之子才華冠後生幾葉尚傳司馬氏  
一官遙向闔閭城人環上座先開講績奏南宮再策名  
吳下舊遊今歷歷送君無限客邊情

吾友副憲通伯之子世經將赴長洲訓導過予需一  
言值初入京師草草賦此吳中故人若李貞伯貳卿  
文宗儒太僕丞楊君謙儀部沈啟南隱君皆素相厚  
者而邢君尤一時賢令尹也因世經之行不能不致  
思焉故詩及之

寄用禮汰萬諸宗人

九衢塵漲拂朱顏  
日日追趨紫禁班  
却憶舊時吟嘯侶  
幾迴清夢落溪山

自六月來屢賜楊梅枇杷及鮓魚諸鮮

素餐無補愧朝簪  
殿左分鮮感聖心  
觸熱到來船似馬  
退朝擎出價兼金  
高堂上獻貽親喜  
講席重遭覺歲深  
犬馬未勝驅策意  
酬恩期不負官箴

送張叔亨侍御巡按雲南二首

才整朝簪拂嶺嵐，  
騎驄馬出滇南。  
足輕萬里心何壯，  
法本三章老正諳。  
金齒兒童迎憲節，  
碧溪山水落詩函。  
歸來便作經年約，  
遠大功名是美談。

花擁長安惜共看，  
人生離合最無端。  
明時再幸陪駕序，  
正學多聞祖易冠。  
笑我少年今亦老，  
重君清節世應難。  
題詩贈別薰風裏，  
白首相期保歲寒。

侍御張君叔亨與予同舉丙戌進士，  
幾三十年矣。君以家艱居廣中久之，  
而予亦放還江南。邇者被召入

朝始獲後先北上方幸接風采聆教言而君又受命  
出按雲南行有日矣因賦律詩二章用見別意兼致  
我私如右君嘗提調學事于畿北故詩及之俾讀者  
有徵焉

送程忠顯進士江西公幹便道還新安

金榜題名愜壯圖便承天語向洪都人環斗極瞻宸扆  
使接星軺候省符恩露染衣過故里薰風吹棹啟長途  
南來北去情何限不盡離亭酒一盃

題畫

黃葉山前一浦通，下留收斧岸西東。  
催科不到漁樵地，贏得風光入畫中。

送陳瑞卿侍御陞山東憲副提督臨清兵備

河上薰風幕府開，承恩人羨得真才。  
虎牙今肅東西境，牙角威生內外臺。  
千里回瞻宸極遠，一方爭候使星來。  
隨車定有翻盆雨，聽取歡聲出草萊。

時方旱故云

寄錫山秦處士七十

進士金之父，誕辰在七夕前一日。

山中誰與樂堯年白髮新秋作壽筵禮客情深茶勝酒  
起家功重筆為田鵠橋縱近寧需巧鶴算能長不叩仙  
雛鳳暫歸恩正洽為君先賦大椿篇

送錢與謙修撰歸省

多病慙歸舊從班却從京邸送君還情知到日都無恙  
樂在雙親一笑間

南風吹馬早塵飛粟種難投麥事非不忍離亭對尊酒  
芸編相贈兩依依



抱玉頻年未受憐一魁天下亦恬然此行更繫詞林望  
不為湖山好放船

暫去還來隔歲期山中猿鶴謾相疑行藏有道乾坤在  
敢望攄忠答聖知

送金宗德還太倉

宗德來視其弟上舍祐  
于京師未幾復歸省母

暑泐征塵客少過聞君歸棹發關河壽萱堂榭違觴遠  
夢草池塘入句多憫旱莫論新舊雨傷離難續短長歌  
勸分有詔知能副賑乏還應到幾何

閏五月十八夜始得雨枕上作

旱魃為妖數月過一宵甘雨足滂沱九重側席憂民切  
百辟匡時入諫多滿地禾苗回積稿幾家牀篋起沈疴  
腐儒不寐聽簷溜雲漢詩成擬載歌

南京工部尚書常熟程公哀輓

負異尋常士蜚揚四十春羣鷗方狎座一鵬遽當辰勇  
見辭榮早勞因按節頻盛名知不朽遺奠出恩綸

都下相過日子今似隔年家傳從歛徒譜擬會吳編舊

業寒江上新墳夕照前臨風歌楚些南望一潸然

送進士王恂省親還毘陵

喜君衣錦還鄉日正是皇州得雨時新水拍河催畫鷁  
祖筵呼酒繫青絲恩榮早入瓊林燕丰采誰當玉樹枝  
雙珮趨朝人屈指不須重調渭城詞

送刑部馬金員外赴謫廬州通判

法署才名久擅廳詞林家學重趨庭謫官遠向濡須塢  
候吏還占貫索星畿甸晚禾看上隴腴河新水待揚舲

器成遠大當盤錯歸及駕班兩鬢青

聽濤篇

朝聽濤謝公墩暮聽濤莫愁村小濤碌碌如鯨翻大濤  
殷殷如雷奔老人來聽日忘倦坐久不覺苔磯温旁人  
借問聽何有川上之趣不可論老人本是林宗孫江東  
舊業詩書存朱顏采采映華髮芙蓉為珮芝為飡管絃  
那肯澆雙耳祇來江上清塵煩六朝遺事渺何許兩岸  
石齒餘苔痕逢人不驚愛沙鳥向舟忽拜隨江豚太平

行樂輸此老安得佳致梅花罇壯哉有子南溟鯤凌風  
勢與孤鳳騫他日鼓鬣登龍門姓名一日聞天閭老人  
聽此應更喜壽與江水同云云

江東郭處士永昂自號聽濤年七十有三矣其子蒙  
實子校藝所得士將入南雍以處士誕辰在歲晏求  
一言歸壽遂賦此篇

半閒為武進周處士彥常賦

其子壻子  
門生也

終身營營笑俗緣平分風月到華顛紅塵未動朝觀槿

白日雖忙夜聽泉林下賞心能自足人間清福許誰專  
克家有子君無恙全樂還應享暮年

送麻城朱正赴唐縣典史

正善地  
理家說

曉看除目下天曹蓮幕如君未二毛民俗共誇唐邑好  
故山遙望楚雲高相逢喜說堪輿事此去方酬案牘勞  
領牒之官應不滯南風吹雨送輕舸

潛川汪惟悅父母雙壽

一堂偕老重潛川丹頰明明未白顛岩下送香春泛筭

弘南騰彩夜當筵尋常花甲增高筭遠近租丁服上田  
養志有人誇令子鶴筒遙寄壽生篇

送劉生還遼東

曉日都門動別顏河橋新霽水潺潺濯纓不負平生志  
問學初升太學班奮跡幾時來桂苑計程三日過榆關  
東藩幕府今何似目斷孤雲送子還

劉生瑾新入太學謁告還遼東拜求一言憶先少保  
尚書襄毅公天順中撫師于東生父迪實在麾下今

三十年矣故于其行悵然有感而贈此詩且致期勉之意云

題王約鈞勒竹

上有子昂題

王猷孫子興超羣閒搦雙鈞畫此君撫景試酬松雪句  
一簾秋景動相雲

送楊憲副志仁之任山東

鏡川學士之子

學聲無忝鏡川公曉日金緋拜命東官舫遡風川漲急  
祖筵經雨市塵空芝顏定出羣英表菜色應回百計中



寒我班行惟拭目看君名績到宸聰

送中書舍人歐陽子履僉憲廣東提調學政

子履

兄子相先以御史僉  
憲雲南提調學政

高銜並列新臺憲盛事爭誇好弟兄  
染翰鳳池常稱旨傳家麟史更知名  
一番尊酒都門道幾處絃歌嶺外城  
聞說梅花千樹在歲寒心緒待君盟

墨竹

北都舊日原無竹近歲蕭蕭綠滿城  
上苑數竿尤得地

東風頭角看崢嶸

進士婺源潘君玉汝得墨竹曰帝苑春風出令蕪水  
攜以自隨既而以考績至京索賦詩其上玉汝嘗從  
游因致意焉

東莊逸興卷為衍聖孔公弘泰題

一莊遙在杏壇東勝地相傳魯泮宮魚鹿性貪林壑美  
樓臺清出市塵空攜壺客訪看花處步屨詩成問稼中  
蔬水解忘人爵貴舞雩千古自春風

竹間凍雀圖

凍羽飛鳴下筆難坐疑聲遠竹枝寒良工趣在芭蕉雪  
莫向賞畫作意看

踏雪尋梅圖

驟鞍回首欲相呼不忍輕拋萬玉圖詩骨與花爭勝絕  
灞橋還似六橋無

壽蔣封君

博聞高譽重南都晴雪絲絲未滿顱思露遠分新賜詔

壽星光射舊懸弧登龍志已輸強子奠鴈心無愧義夫  
遐筭不須誇降嶽蔣山高姓恰相符

潤齋蔣君宗玉世居金陵為耆儒年四十不再偶甚  
見重于士林明年壽週一甲適其子吏部主事浚以  
考績獲勅封之命於其歸壽也特求予詩故與賦此  
主一齋為都憲常熟徐公賦

行臺徐公公肅字作宦屢更天下事顧名思守父師言  
主一題齋遠相示聖人立教先敬身大賢受訓仍書紳

嚮晦燕息毋敢肆云誰有志希先民主一開端子程子  
基聖功成此終始敬夫銘與晦翁箴石本空餘墨盈紙  
願公勗哉持寸心端居儼若神明臨緝熙問學不但已  
海虞山高吳水深

汪希顏親家拜貴州憲使有詩奉賀

持憲終歸老法官除書先報鵲聲歡衣冠正數汪家盛  
山水休歌蜀道難塵裏鬢毛驚漸白古來風節炳如丹  
送君只有中天月夜夜清輝兩地看

希顏之兄太守文燦從子寺副守貞憲僉從仁與其  
餘佐州縣教庠序登科名者六七十人皆出一族可謂  
盛矣部使者嘗立聚英坊以表之求予記久未能復  
也故詩及之以逭責云

題扇寄大衍聖公

半規明月影沈沈持贈秋來意轉深  
料得王孫不輕棄清風常繫故人心

送編修劉可大還廣東省母

慈母年高雪滿簪綵衣歸侍促歸驂鸞封特降雲霞爛  
鶴醞遙分雨露覃東莞壽徵占婺女北堂花事到宜男  
詞林孝義如君少幾日恩光過嶺南

壽致仕學諭松坡王先生

子御史鼎出按二  
廣有過家之便

青氈歸老白頭新六十于今又七春手摘晚蔬供斗酒  
坐臨秋水濯纓塵三時適意松坡稿百歲論文蔗境人  
光動鯉庭增燕喜豸冠持節止過閩

畫蘭

故教授彭城馬君嘗以蘭題其齋且號其集蓋一時名流也其子暉今守潞州托善繪者為圖以著其思親之意來京師求一言予素重潞州故為之

賦云

九畹風來春晝長  
深林馥馥聞幽香  
紫蕤數莖葉劍綠  
恥與百卉爭妍妝  
廣文愛蘭如愛友  
繞誦離騷不停口  
一朝乘化去弗還  
寂寞芳叢委榛莠  
過庭有子專城居  
生綃貌得真璫璵  
修篁奇石相映帶  
高潔宛露水霜餘



罔極情深花自好名筆何須雪窓老兒孫願比謝家郎  
白日高堂鎮相保

送劉仁仲修撰還蜀

勇冠投老住江鄉之子歸寧下玉堂路指白鹽論萬里  
史成金匱重三長壽尊滿注郢筒酒舞袖遙分漢殿香  
還闕有期應暫別不須開宴奏清商

題吳氏樂義卷

南涉江淮北到燕東風嘗送估人船黃塵赤日相逢地

驚見吳家樂義編

商山深處一齋居遠客歸時樂有餘教子義方開義塾  
牙籤重理竹洲書

休寧商山吳君貫之宋竹洲先生之裔也以貿易往  
來南北而題其齋曰樂義其亦不忘先訓而有警於  
後來者歟

八月二十一日飲城東夏氏園

城東全不覺秋來小飲新亭晷畫開池躍一丸驚弄水

雲隨雙屐笑登臺園爭洛下誰當勝曲愧巴中我未才  
斜日尚牽餘興在馬蹄沿路踏莓苔

送俞濬之侍御赴四川憲副飭兵備于綿安

濬之

季父欽嘗以兵部  
郎中從先公

倚劍休歌蜀道難提刑風采重臺端新袍刺豸緋偏稱  
御敕盤龍墨未乾人困瘡痍思按節家傳韜畧試登壇  
祖筵正及黃花候珍重離觴一共看

壽致政謝都憲

子廷柱舉人求賦  
誕辰在三月五日

都臺清譽重三巴  
解綬歸來閱歲華  
雪後松筠同壽域  
山中泉石富生涯  
一宵共覩長庚瑞  
兩日才看上巳花  
遙望閩南歌戲綵  
芝蘭原出舊名家

太白騎鯨圖

長庚何罪謫九天  
墮地亦作人中仙  
吐詞如神醉不死  
江山落魄驚無前  
采石磯頭弄明月  
醉眼渾疑爛銀闕  
翻身却入馮夷宮  
鐵網珊瑚任攀揭  
揚侯知此太白精  
奉歸帝所無留行  
青冥風露九萬里  
掉尾獨跨橫山鯨

花鳥紛紛渺塵海千古騷人憶丰采畫圖想像知有無  
羸得旁觀小兒駭

飲英國公凝眺軒

池閣新開帝苑東偶來亭上一尊同彩虹拔地紆高樹  
玉筍排雲入半空晴亟尚霏花下雨暑殘仍愛柳邊風  
隔牆語笑相聞處只似江南畫畫中

上公清致出塵凡幾許雲根疊翠巖花為奉親時下幄  
酒因留客贖開函嘉蔬不責新園課奇石猶鷄舊內銜

周覽未窮歸未得半簾斜日下庭杉

送董學士尚矩赴南京禮部侍郎

去國五年驚再見不堪君去更臨岐  
詞林望久先膺薦講幄功深合受知  
南部衣冠今典禮北河風雪此傷離  
貴人白髮從來是老手調元正未遲

十月廿六日大雪約廉伯賓之二學士啟昭庶

子小飲

新雪滿長安東城特地寒少須開賞券未敢立詩壇凍

蟻先浮盞河魴亦上盤便應騎馬到一笑共清歡

壽致仕周二令先生

先外母夫人之弟所著  
有澹然藁壽八十矣

雙瞳如月鬢如絲林壑爭迎海鶴姿  
釀秫仙來長對酒哦松人老只耽詩  
渭濱尚父同高壽洛下耆英會盛時  
一曲長生千歲祝才情深愧郢中詞

同年小集得雲字

車馬集深巷寒飈淨塵氛肅登君子堂  
晤言得交欣憶在先皇初奉對  
慚謏聞同榜三百餘一一揚清芬  
俛仰

三十年忽忽驚離羣聚散豈足言零落悲朝曛攜手僅  
十人况有天涯分幸哉身尚健無惜孟行勤我齒后諸  
公霜髯條其殷茲會寧偶爾所期在崇文圖報各勉旃  
繼聖真華勛張燈出新令促席矜鑪薰禁鼓屢換更客  
顏亦霑醺月上未忍別悠然賦停雲

黃少參汝器談僉憲時英段郡守以忠之待次及考  
績來京也黃京尹士英林司成亨大齊太常應壁侶  
亞卿大器陸翰長廉伯及予約為同年會而飲于廉



伯之第時屠都憲朝宗方陞見之明日亦請入席晤  
言甚洽蓋夜盡一鼓乃散惟丙戌榜進士三百五十  
三人今仕中外者七十一人茲會又不過十人而以  
忠以疾不至汝器能皆誦其升沈存歿之詳歷歷可  
念也朝宗謂茲會不可無紀以詩倡而析渭北江東  
之句為韻俾各拈其一予最少得雲字因口占如右  
并識其事云

小李將軍岳陽樓景

岳陽圖蹟重魚金尺素何人手更臨  
瓦布蛛絲憑錯綜  
山呈螺黛欲浮沈  
氣蒸波撼中唐句  
後樂先憂一范心  
閒指畫闌揩病目  
卧遊情共楚雲深

段中貴請賞紅梅

幾多榛棘委寒叢  
春意先回紫禁東  
仙骨換來砂正伏  
玉顏醜處酒微中  
風前香觸冰霜冷  
天上根涵雨露豐  
曾是江南花下客  
不辭題賞付詩筒

輞川圖為段中貴題

段公所居有玩芳亭  
滿前生意諸勝處

右丞家住東南麓石徑盤雲走川曲山亭水榭連數村  
物色依稀畫難足右丞一去今幾塵披圖忽見終南春  
水榭山亭渺何許却道園林都逼真真耶畫耶兩陳迹  
秀句翻成北山榭當時習靜亦少人詩板寥寥僅裴迪  
孟城坳近華子崗芙蓉花亂辛夷香青莎濛濛鹿羣過  
白石齒齒灘聲長椒園柵鎖山梁右竹館門開野塘口  
幾多幽勝落荒寒泉石遭逢正非偶文昌好古居鳳城  
胸中即壑千金輕宋摹唐本此第一粉黛碌碌難為情

玩芳亭與臨湖並生意滿前春烟烟我欲顏之小輞川  
看盡題詩啜新茗

壽肅州劉參將景昌七十

景昌子為羽林指揮  
使李學士賓之其甥

也

玉關人老得歸來綺席還從壽旦開壯歲兒堪飛將選  
幾家甥似謫仙才霜侵短髮猶看劍春溢酡顏更喚盃  
願作延州來季子不須騎鹿向蓬萊

賞雪次韻廉伯學士

憶當乘雪來蕭齋偶然憩坐令塵慮空何必春可禊豪  
談激清響小飲失寒厲我髮日夜改任爾暮相綴老翠  
森在列妖紅謝殊麗前隣續佳盟再白已更醉今年告  
荒甚遠邇物色悴大有思特書粒食感同類君王視郊  
牲肅肅徵帝惠衣冠獲隨步耿耿候輿衛居然得三白  
預想蘇萬彙賞券應不孤吟筒倏先置興思潑蟻濃冷  
未怯貂敝尊前作賦手敢與兔園對心期洛下徒不負  
寸陰歲弛張姑自解一笑出公議此白如未已入眼四

成瑞東郭留餘歡  
西城卜新會  
令嚴白戰鐵  
價重掃愁  
簞行樂及旬休  
迂疎愧風致

西涯學士再和東坡雪韻邀予同作四章

剪水天人萬玉纖  
六花隨手辦  
何嚴因風不惜泥  
沾絮到竹時  
驚箸裏鹽曉誤  
一雞先報寢  
饑憐羣雀亂投簷  
書生畎畝情  
偏劇喜淪新茶  
試筍尖

一色遙空點去鴉  
小園荒井罷翻車  
地堆龍甲成沙陣  
風剪鵝毛作屬花  
破蔡竒功収制閩  
探梅高興屬詩家

南山虎迹年來盡冷落平原獵士义

滕六行空勢太纖一陽才復氣仍嚴  
苦憐漢節羈青海快想巴流下白鹽  
呈瑞半鋪金殿瓦妬妝偏綴玉堂簷  
擁爐細讀梁園賦頗覺南朝語更尖

霏霏乘曙及昏鴉河上冰堅欲度車  
幾處疲癢愁乞米滿城兒女笑團花  
踵門共喜來雙士郢曲新聞得數家  
起答故人揮凍筆印泥鴻爪任交叉

和吳亞卿道本得孫之作

東雷驚起籜龍兒，老節俄添玉一枝。  
兆叶仙禽來夢日，喜聽英物試啼時。  
門隨北俗長拖錦，宴出閩肴半雜飴。  
書種有人公意足，霜髯促爾遍方願。

道本豐願  
美髯故云

十二月十九日南郊視牲作

帝城南下淨無塵，夜漏初嚴第一巡。  
禁衛護行分虎旅，牲房傳號立犧人。  
出門尚覺雲隨履，歸路俄驚月在身。  
明日仗前當奏御，坐聽金鑰待雞晨。

立春前一日約江文瀾侍讀李子陽修撰小飲



卜居欣得侶咫尺巷西東老馬能知道新詩合注筒鞭  
庭春不遠掃徑雪初融凍潑家醅在先期一笑同

喜同年屠朝宗都憲卜居正得賓之舊宅次韻  
幾年離合誦停雲此日叨隨燕賀羣名重栢臺同鮑隸  
壽期椿府似茅君舊堂主尚多情在新曲誰當善頌聞  
談笑不妨清漏促帝城春色喜初分

廉伯學士家賞盆梅限韻

幾點寒香綴一枝隴頭人遠寄何時冰容不受緇塵澆

玉種長疑白露滋  
尺幹便能經歲虐  
羣芳隨爾競春私  
何緣老相心如鐵  
却對花神吐麗詞

江南勝賞欲殘枝  
冀北初看木後時  
月色有情長遣照  
春光無迹暗相滋  
盟期竹友心方稱  
譜作花魁譽豈私  
繞匝願聽三弄闋  
朱絃誰續舊歌詞

箕墩文集卷八十九